

Parosifa fain Pol-ke wi Kolosi wia siisimomak

Miimow opora

Kolosi owowa Esia kame-pa ikua. Ne Efesus owowa pun Kolosi wameiya-pa ikua. Pol ona me ikiwok, o Efesus-pa ikok uuwow mua papako wia sesekeya kame nain ikiwep Yeesus opor eliwa wia maakiwkin Kristen teeria aremik.

Aria Pol Rom-pa koora ekak. Naap ikok opora feenap miimak, wi Kolosi Yeesus opora wiar ookam-ikemik nain mua papako-ke kema wia momoram-ikemik. Naapeya os-ke wi Kolosi kema wia kekanowekam naep parosifa wia siisimomak. Wia maakek, Krai waisow i yia aawok. Era oko-ko me ikua. Era oko oko nain i Krai wameiya wiar ekowa yia samoriya. Mua Maneka-ke Krai naep maa muutitik onomakek, ne Krai uuwowa neeke maa muutitik unowa nain Mua Maneka ona nainiw aawomakinon. Krai i yiamiya ikaeya emerua mua enuma arep o sira unowa nain wiar ookimik.

1 ¹⁻²Yo Pol-ke yena emar Timoti ikos ni Kolosi parosifa fain nia siisimomimik. Yo Yeesus Krai aposel-ke, ne Mua Maneka ona kookalowa-pa Krai uuwowa nain yo efa pepekimok, yo mua nain. Aria ni eena unow onaiya Mua Maneka teeria wiar ikeman, ne ni Krai baliwep ookam-ikaiman nain i feenap nia maimik, yiena Auwa Mua Maneka-ke nia kemalep nia asipami kema sonom eliwa niinok.

Wi Yeesus teeria-pa wiar ikok sira eliwa imenamik

³⁻⁴I opora feenap niar miimamik, ni Yeesus Krai opor eliwa wiar miimap kekanowa naap opap ikaiman, ne ni ona teeria unowa nain pun niam kookaliman. Muuta nain i yiena Maneka Yeesus Krai ona Wiawi Mua Maneka faremi sira eliwa naakimik. ⁵Ni iiriw Yeesus Krai opor eliwa eena opor makena nain nia maakiwkin miimap ikeman. Ne Mua Maneka eena maa eliwa owow iinan-pa nia wuap-puomak nain pun miimap amisarep ikeman. Ne ni nain makena-ke naep arewami kema suuwam-ikaiman. ⁶Naapeya ni sira eliwa imeniman, ne ni unowa pun opora nain miimap opaman. Ni Yeesus Krai opor eliwa wiar miimap

Mua Maneka nia asipiya nain maken akena amisareman. Sira naapiw miiw unowa opor eliwa nain manekareya owow unowa miimap makena-ke naep ookimik. Neeke sira eliwa wiar imenariya. ⁷Iriw Epafras-ke Yeesus Krai opor eliwa nain nia maakeya ni amisarep ikeman. O yena uuwow epaskun eena yena kookaliyem, ne Krai uuwowa baliwep uuwomiya, mua nain. I Krai opor eliwa nia maakowa nain os-ke yia asipap ikiwep nia maakek. ⁸Ne ni niamiya ikok ekapemi feenap yia maakek, wi Yeesus Krai teeria epaskun arep manek akena wiam kookalimik, naap nia maek.

Pol Mua Maneka farek, wi Kolosi wia asipinok naep

⁹Aria ni sira eliwa oniman nain niar miimap i kema suuwam-ikaimik. Naapeya anane Mua Maneka nia asipam-ikainok naep farimik. Feenap, Ewar Eliwa-ke amis eliwa, sira nieya kema-pa maneka niar imenareya o sira kookaliya nain amisarep wiar ookam-ikowen. ¹⁰Ne yiena Maneka unum manek akena ikainok naep sira makena-pa ikowen. Ni naap onami anane ona kookalowa wiar ookami sira eliwa unowa onowen. Naeya ni Mua Maneka amisarowen, ne amisa nain naap niar manekaremi ikim-ikainon. ¹¹Ne pun Mua Maneka faremi feenap nokarimik, ona kekanow maneka-pa ni nia kekanoweya ni eliw kekanep pina akuawowen. Naap ikok ni kekanep kekelka ikowen. ¹²Ne naap kema eliw wia ikok yiena Auwa sira eliwa naakem-ikowen. Os-ke ona teeria-pa nia wueya ni ikoka owow dubila melin eliwa neek ikiwep maa ele-eliwa nia wuap-puomak nain makena urufowen. ¹³I Satan wapena-pa wiar ikemkun os-ke yia aawep ona Muuka kemena-pa yia wueya i eliwa ikemik, Muuka eena manek akena kookaliya nain. ¹⁴I pina-ke yia wasieya ikemkun Muuka nain-ke i umowa epak nain wame wuami yia aaweya i eliwa ikaimik. O naap oneya Mua Maneka-ke i pina yiar iirarek.

Krais sira ne ona uuwowa

¹⁵I Mua Maneka mokok onaiya me urufimik. Nain ona Muuka Yeesus Krai urufap maimik, i Mua Maneka fan urufimik. O Mua Maneka epaskun ikua. Os-ke iperowa arep maa unowa Mua Maneka onomakek nain onamiarek. ¹⁶Moram Mua Maneka Muuka kuisow nain ikos maa unowa onomakemik, eena iinan maa me urufimik nain ne miiwa-pa maa urufimik nain, ne wi ensel, wi owow saria, wi anim onoma, ne wi woos mua, wi teeria kekanowa onaiya ikemik nain. O Muuka nain naep wi wia wuomakek ne Muuka nain-ke wia urufam-ikainon. ¹⁷Iriw miiw maa muutitik me onowa ikaeya Muuka nain ona iiriw wia ikua. Naapeya maa unowa nain aakisa os-ke urufam-ikaeya anirap ikomakek. ¹⁸Os-ke miimeya maa muutitik o tepak-pa ikua. Naapeya i ona teeria o mia arake, ne woosa os-ke ikua. Ona teeria maa muutitik onoma os. Ne o kiikir

akena umep iikirak. ¹⁹Moram Mua Maneka ona kamenap ikua nain ona kookalowa-pa Muuka mia-pa wuak nain ona Wiawi pepeka akena arek. ²⁰Ne Muuka-ke era eepeya miw maa unowa ne iinan maa unowa kiiriw yena efar ekapuk naep Muuka sesekak. Ne Mua Maneka ona kookalek naap Krai nomokow moke-pa umemi aka sawikak. Naeya i o irewap ikemik nain kiiriw yia aawok.

²¹Ni iiriw sira samo-samora onaman nan Mua Maneka epasia-pa wiar ikeman, ne mikikira iwem-ikeman. ²²Nain aakisa Krai ona mia wame wuami nomokow moke-pa umok. Muut nain Mua Maneka-ke nia irewow marew nia aawep ona wameiya-pa nia wuak. Naeya ni aakisa o mokoka-pa dubil muuta ikeman, opor marew ne pina marew ikeman. ²³Nain ni opor eliwa baliwep opami kekanep ikowen-na eliw. Oko ni kema gariarep eena iiriw opor eliwa miimap opap ikeman nain piipuowen. Opor eliwa fain miw unowa owow unowa-pa wia maakem-miawiwkin miimamik. Ne yo Pol pun uuwowa fain aawep nia asipami soomarem-miawiyem.

Pol uuwowa yoowa aawok nain maek

²⁴Aria yo aakisa ni muuta nain yoowa aawiyem fain pun eliwa-ke. I Krai teeria unowa nain ona mia ara saarik ikemik. Krai ona teeria muuta yoowa aawowa nain me wiar weeserowa ikua. Ne aakisa yo yoowa aawiyem fain Krai teeria yoowa aawemik nain wiar puowawiyem. ²⁵Ne Mua Maneka ona efa pepekimep ona opora nia maakowa uuwowa nain yo mia-pa efar wuak. Naeya yo ni Yeesus teeria uuwow mua niar arem. ²⁶Opora eena iiriw kokot ikua nain wi iiriw mua me amisaremik, ekapep aakisa efa fain i Yeesus opora wiar opamik nain ona yia maakeya amisaremik. ²⁷Opor kokot nain feenap, Mua Maneka ona kookalowa-pa opora nain miw unowa pun nia maakiwkin feenap amisarowen, Krai anane ni niamiya ikaiya. Ne wiimar o mia parin onaiya ne unum maneka naap imenariya nain nis pun naap imenarowen. ²⁸I anane Krai opor eliwa emeria mua unowa wia maakimik. Wia maakemi baliwep kema suuwap opora baliwep akena wia ookomami ifana wiarimik. Naap oni-ikim-ikemkun wi mua unowiya Krai wameiya ikok Mua Maneka mokoka-pa dubil akena ikaikuan naep. ²⁹Yo nain naep uuwow yoowa fain kekanep naap uuw-ikim-ikaiyem. Krai ona kekanow maneka onaiya efa kekanowam-ikaeya uuwiyem.

Opor wadola piipuap opor makena muutiw ookuk

2 ¹Aria ni feenap amisareka, yo anane ni ne wi Laodisia nia asipekam naep naap kekanem-ikaiyem. Ne wi emeria mua papako pun wia asipiyem, wi miira me efa urufimik nain. ²Naeya ni kekanep Mua Maneka teeria-pa epaskun arep niam kookalem-ikowen. Ne kema pukep maa muutitik amisar-afuowen. Naap ikok Mua Maneka opora eena kokot wiar

ikua nain baliwep akena amisarowen. Opora kokot nain onoma Krai naneka. ³O eena amis eliwa ne kema suuwowa eliwa wiar taanep ikua nain. ⁴Naeya mua oko-ke nia peeskimemi opor sira-sira nia maakiwkin-na makena-ke me wiar naeka naep opor unowa fain nia maakiyem. ⁵Makena, yo ni niamiya me ikaiyem, nain manek akena nia kema suuwam-ikaiyem. Ni maa muutitik kakeniw ona sira ookami oniman. Ne kekanep Krai opora naap opap ikaiman nain niar miimap kemeliyem.

I Krai epaskun arep maa eliwa urufiyen

⁶Ni iiriw yiena Maneka Yeesus Krai opora wiar miimap opaman, naapeya o epaskun arep naap ikeka. ⁷Feenap, ni kekanowa akena o wiar ikeka, nomokowa eena kekanowa onaiya arimiya naap. Ne pun koor eena poka kekanowa-pa koonep ikaiya naap akena ikeka. Naemi i opor eliwa nia maakemik nain kekanowa akena ookam-ikok anane maneka Mua Maneka sira eliwa naakem-ikeka.

⁸Naapeya ni maa urufami, oko kema gariarep mua oko-ke sira maken marewa-pa nia pikiwiwkin kokor erowen. Wi sira naap nain iiriw wienna weke-pa ekapok, ne pun ona miiw sira-ke. Ne wi me Krai opora wiar maimik, weetak. ⁹Ni Krai waisow miimam-ikeka. Moram, Mua Maneka-ke Krai aremi mia kanima onaiya ikua, nain o Mua Maneka maken akena-ke. ¹⁰Ne o miimep wi anim onoma ne maa muutitik kekanowa onaiya ikomakemik nain wia urufam-ikaiya. Naapeya ni o epaskun arep sira unowa iiwawun pepek erowen. ¹¹⁻¹²Ni Krai opora wiar opiwkin nia yasuwamik. Naeya ni Krai epaskun arep umowa saarik ikeman. O umep eruwa-pa ikaeya Mua Maneka-ke ona kekanowa-pa iikirowak nain, nis pun nia iikirowak. Naapeya ni o epaskun ariwkin os-ke mia kanima niar puukowa saarik arek. Mia kanima puukowa sira nain mia kanima puukap iirarimik. Nain Krai sira nia onak nain me mia-pa nia onak, weetak. O pina sira-sira niar iirareya ni pina onowa kema marew.

¹³Ni iiriw miiw sira-pa ikok pina sira-sira onam-ikeman ne sira nain-ke nia ifakimeya ni umowa saarik ikeman. Nain Mua Maneka-ke ni pina unowa niar iiraremi Krai wameiya nia iikiroweya ni anane eliwa ikowa-pa ikeman. ¹⁴Feenap, i pina unowa onimik muuta nain i opora-pa ikemik. Ne os-ke Krai nomokow moke-pa umok nan muuna yiar weeser-wuami opora nain yiar umukak. ¹⁵O nomokow moke-pa umok nain-pa wi ewar kekanowa ne maa papako kekanowa onaiya ikemik nain kekanowa iiwawun wiar weeser-wuak. Wi kekanowa naap wiar nomakek nain iiwawun wia porop ariman akena emina wia ururowak.

I Krai wameiya ikok sira wiar ookiyen

¹⁶Naapeya ni feenap oneka, maa enowa ne eka enowa sira, fofa maneka wuowa ne siiw enuma ookowa, maapora fofa ne Sabat fofa sira

ookowa, nain niena baliwep kema suuwap ookeka. Mua oko-ke kema nia mikami me nia maakuk. ¹⁷Sira unowa fain oram kukusa-ke, maa makena wiimar imenarowa nain pepekimok. Nain Kraiss-ke makena, os-ke maa makena yia pekapomak. ¹⁸⁻¹⁹Wi mua wiena wadolalep wiam poromi wi ensel unuma wia purupemi sira-sira onimik. Ne nis pun i yiokeka naep naap nia maakimik. Ni me wia miimeka. Moram wi mua nain wiena miiw sira-pa ikok oram maneka wiam purupemi maem-miawimik, “Yo mokoka-keriw kirep maa-ko urufam.” Naemi oram maneka wiam maimik, “Maa muutitik is-ke amisaremik.” Wi mua nain Kraiss ookowa iiriw piipuumik. Aria Kraiss-na woosa-ke, ne os-ke ni ona teeria kekanowa nieya kekanowa onaiya ikok epaskun aremi unowiya baliwep o ookiman. Ne Mua Maneka-ke nia kekanowam-ikaeya Yeesus ookowa amisa nain naap niar manekarem-ikainon.

²⁰Ni Kraiss epaskun akena ikeman. Naapeya ni iiriw umep ikowa saarik ikaiwkin miiw sira samora unowa me nia mufem-ikaiya. Ne kamenap naep ni aakisa miiw sira unowa tepak-pa ikowa saarik sira unowa fain ookam-ikaiman? Wi feenap maimik nain, ²¹“Maa fain me one. Maa fain enowa emi,” e “Maa nain me tiime,” opora naap nain. ²²Sira unowa nain oram-ke. Wiena woosa-pa imenap nia ofakowimik. Nain miiw maa-ke, naeya maa onamkun miiwa-pa mesenalowa-ke. ²³Feenap, wi wiena kema-pa lotu sira-sira imenimik ne wiena wadola-pa wiam porop wiena mia sirirowa wiam iwimik. Makena, wia urufowa-ke wi maa amisarep maa onowa saarik, naap wia urufinan. Nain wi lotu sira-sira onimik nain pokow eliwa me wia asipinon. Naeya maa kookalowa sira naap wiar ikim-ikainon.

Mua Maneka-ke i Kraiss wameiya yia iikirowak

3 ¹Aria Mua Maneka-ke Kraiss iikirowak nain nis pun nia iikirowak. Naapeya ni iinan owowa manek akena kema wuam-ikeka, eena Kraiss-ke Mua Maneka aken ekeria-pa wiar pokap ikua, owowa nain. ²Ni miiw maa unowa kema me wueka. ³⁻⁴Moram ni iiriw umep ikowa saarik ikok miiw sira piipuuman. Naeya ni Mua Maneka wameiya-pa wiar ikeman. Nain onoma Kraiss, eena ni kema-pa niar uuwiya nain. Ne ikoka o nainiw miiwa oraiya nain mia parin onaiya ne unum maneka ikainon, ne nis pun o epaskun naap ikowen.

I emeria mua enuma aremik

⁵Aria naapeya ni miiw sira unowa kema-pa niar ikomakek nain iiwawun piipu-afureka. Sira feenap nain, uruw mia samora, enum eruarowa, maa unowa kema kuowa ne mia kookalow manekiw ikowa, maa kookalep ifemakowa, maa kookalowa kema manekiw ikok Mua Maneka me kema suuwowa, sira naap nain. ⁶Wi mua Mua Maneka opora wiar fienap sira

naap onimik nain ikoka o bagiw wiar urufikuan. ⁷Ne nis pun iiriw sira samora unowa nain-ke niar ikaeya naap ookam-ikeman. ⁸Ne aakisa ni sira fain iiwawun piipueka, kema bagiwirowa ne maa iririmowa, mua oko wia samorowa, wia tuunowa ne opor kia-kia aakunowa, sira naap nain iiwawun piipueka. ⁹Ne nieniw me niam peeskimeka. Moram niena sira awona kema-pa niar ikomakek nain iiriw iirarep emeria mua enuma puukaman. ¹⁰Ne Mua Maneka eena miiwa maa muutitik onomakek nain-ke kema nia dubilam-ikaeya ona sira iiwawun pepeker eriman. ¹¹I aakisa mua enuma puukap i unowiya epaskun akena ikemik. Naapeya i yiam fookap feenap me maiyen, ni Grik teeria-ke, ni mia kanima me puukiman ne i Yuuda teeria-ke, i mia kanima puukimik. Ni owow oko-ke, ni mua asia-ke, i yiena wenup ikaiyen. Ni uuwow mua sesa marew oram wia uuwam-ikomiman ne i yiena kakeniw miiwa-pa uuwimik, weetak, i naap me yiam maiyen. Moram Krai waisow maneka, ne i kema suuwimik nain waisow nanek.

I kema wiisarow sira-pa ikaiyen

¹²Mua Maneka ona iiriw nia nanikap nia aaweya ona teeria-pa wiar ikeman. Ne pun o manek akena nia kookaliya. Naapeya ni nain kema suuwap feenap onam-ikeka. Mua wia kemalep wia saliwami kekelkiya wia wueka. Ni niena niam poreka. Ne pina-ko nia oniwkin-na ewur me kema bagiwireka. ¹³Mua oko-ke maa niar samorinok-na miikapura me oneka, pina nain me wiar kema suuweka. Moram Mua Maneka pun pina niar iirariya, naeya nis pun naap akena oneka. ¹⁴Sira unowa eliwa, nain niam kookalowa sira nain manek akena-ke. Naapeya niam kookalowa sira miimowa-pa wuowen-na sira unowa nain pun onami baliwep akena epaskun ikowen.

¹⁵Krais-ke ni kema eliwa ikeka naep nia fareya ni unowiya kema eliw wiar ikok epaskun areman. Naapeya o kema sonom eliwa niek nain kema-pa niar taanep ikainok. Naeya ni niam saliwam-ikowen. Naap onami Mua Maneka sira eliwa naakem-ikeka. ¹⁶Ni anane Krai opor eliwa unowa nain kema-pa niar kekanep ikainok. Naap ikaeya kema pukep opora aakunemi niam maakem-ikeka. Naeya ni unowiya sira eliwa-pa ikowen. Naap onami niena kema-pa Mua Maneka sira eliwa naakemi someka Mua Maneka opora-pa ikomakek nain awemi lotu someka papako pun awem-ikeka. Ne someka enuma papako Ewar Eliwa-ke kema niiya nain awem-ikeka. ¹⁷Ni opora aakunowa ne uuwow unowa nain yiena Maneka Yeesus kema suuwap o unuma-pa aakuneka ne uuwowa oneka. Naap onami o unuma unufami Mua Maneka sira eliwa naakem-ikeka.

Wi mua emeria miewemik nain ne wienna muuka wiipa

¹⁸Aria ni emeria niena mua tepak-pa wiar ikok opora wiar miimeka. Moram yiena Maneka teeria-pa wiar ikemik nain sira naap onowa-ke.

¹⁹Ne ni mua pun naap, niena emeria wia kookaleka, me wia iririmeka.
²⁰Aria takira, neene niawi opora wia miimeka. Moram yiena Maneka sira nain niar urufowa kookaliya. ²¹Aria ni emeria mua, niena muuka wiipa kema me wia bagiwiroweka, oko wi neeke kema pinarikuan.

Wi uuwow mua ne wi woos mua sira

²²Aria ni uuwow mua eena sesa marew wia uuwomiman nain niena woos mua opora wiar miimeka. Feenap me maeka, "I wadolalemi wiena mokoka-pa baliwep uuwamkun uuwow mua eliwa-ke yia nauk." Naap me maeka, weetak. Yiena Maneka Yeesus Krai ekima opap kema kuisow wuap uuwowa baliwep oneka. ²³Uuwow unowa oniman nain palanemi uuweka. I me wi mua nain wiar uuwimik, weetak, i yiena Maneka ona wiar uuwimik, naap maeka. ²⁴Moram ni amisareman, ikoka yiena Maneka ona ni sira eliwa oniman nain nia kiripomaya maa eliwa iiriw nia wuap-puomak nain makena urufowen. Naapeya ni feenap kema suuweka, makena, wi mua wia uuwomiman, nain yiena Maneka uuwow sira niar urufiya. ²⁵No maa baliwep me oninan-na ikoka Mua Maneka-ke pina nain kiripami yoowa niinon. Moram o me yia mekawiya, no uuwow mua-i e saria-i, epaskun naap sira niar urufiya.

4 ¹Aria ni saria niena uuwow mua nia uuwomimik nain baliwep wia wueka, ne uuwow sira ookami kakeniw wia kakaltam-ikeka. Moram, nis pun mua oko tepak-pa ikeman, Mua Maneka eena owow iinan-pa ikua nain.

Mua Maneka farowa ne kakeniw soomarowa sira

²Ni Mua Maneka farowa kekanem-ikeka. Ne palanep o faremi sira eliwa naakem-ikeka. ³Ne is pun yia kema suuwap Mua Maneka nokariwkin era yia eepomaya Krai opora wia maakem-ikaiyen. Opora eena iiriw kokot wiar ikua ne aakisa ariman arek nain wia maakiyen. Makena, yo o opora muuta nain koorapa efa wuamik. ⁴Naapeya ni Mua Maneka farep nokariwkin efa asipeya ona opor kemena baliwep wia fookomamkun amisaruk. Yo nain maowa efar ikua.

⁵Wi sisin mua wiamiya ikok-na baliwep kema suuwap sira eliiw oneka. Ne Krai opora wia maakowa nain kemaiw ikok opora oko aakunemi anewami nain wia maakeka. ⁶Ne wia asipowa naep Krai opora baliwep wia nanaromiwkin wi miimowa-ke wiar afililinok. Naemi opora-ko nia nokariwkin-na opora pupep kakeniw wia kiripomowen.

Tikikus Onesimus ikos wia sesekak

⁷Yo aakisa kamenap ikem nain ikoka Tikikus-ke niar ikiwemi nia maakinok. O yiena emar eliwa-ke ne uuwow epaskun, Mua Maneka uuwow mua kakeniw-ke. ⁸Ikiwemi i kamenap ikemik nain nia maakemi

nia kekanowinok naep yo sesekamkun ni niar ikiwinon. ⁹Onesimus niena owow epaskun pun ikoka sesekinen. O yena emar eliwa-ke, ne ikoka Tikikus wameiya niar ikiwep maa mauwa i yiar imenarek nain nia maakikuan.

Pol Kolosi sira eliwa wia naakek

¹⁰Aria Aristakus i aakisa ikos kooro ekap ikemik, o nia maek, ni eliwa ikeka nia naek. Banabas womar Mak pun ni eliwa ikeka nia naek. Yo iiriw feenap nia maakep-puam, o iir oko-pa ikiwep niar fuuninok-na sira eliwa, kookalep aaweka. ¹¹Ne Yosua, eena unum oko Yastus, os pun naap nia maek, ni eliwa ikeka naek. Wi Yuuda mua wiam arow fain-ke yo efamiya uuwami Mua Maneka pika kemena-pa ikowa opora nain wia maakem-miawimik.

¹²Aria Epafras pun nia maek, ni eliwa ikeka naek. Os pun Krai Yeesus uuwowa wiar opiya. O Mua Maneka ona nia kekanoweya ni kekanep ikok kookalowa baliwep wiar amisareka naep anane Mua Maneka kekanowa akena farem-ikaiya. ¹³Yo fain nia maakiyem, makena, ni nia naep anane uuwow yoowa naap aawem-ikaiya. Me ni niisow, wi Laodisia ne wi Ierapolis pun sira naap wia oniya. ¹⁴Ne yiena emar eliwa Luk, eena ikemika kaikow mua nain, Demas ikos ni eliwa ikeka nia naimik.

¹⁵Aria Yeesus teeria Laodisia-pa ikemik nain wia maakeka, yo Pol-ke maiyem, ni eliwa ikeka wia naiyem. Aria ni Nimfa pun maakeka, no eliwa ike naap maiyem, ne wi teeria o kooro-pa wiar firimimik nain pun sira naapiw wia maakeka.

¹⁶Aria parosifa fain urufap-puap wi Laodisia teeria wia sesekomaka, wis pun urufuk. Ne parosifa oko wi Laodisia wia sesekomam nain ni Kolosi pun eliw wiar urufowen. ¹⁷Ne Arkipus feenap maakeka, “Yiena Maneka uuwowa niek nain baliwep uuw-ikiwemi iiwawun wiar welawe,” naap maakeka.

¹⁸Aria opor ara fain yena wapen siisia kakeniw siisimiyem. Siisimemi ni nia maiyem, eliwa ikeka nia naiyem. Yo kooro-pa ikem fain yo efa kema suuweka. Yiena Mua Maneka anane nia kemalemi nia asipam-ikainok.